



Editorial

Pathian mapuina zal in “Damna Aw” September – October, 2020 suadawk thei ding ah I um tak ziak un ma ei puitu Pathian chu lopina chang ta hen. Tu ma-deu a khan Imphal lam ah lockdown hat deu ziak in press lam in August tha issue sawt deu a hung hentang khau a, ziaziaakchun, tuchung issue hi a hung vaigei tak ziak in September leh October issue a hung kigawmkhawm ta, simtute la ngaithiamnau ka hun dawn masa ahi.

Tu kum hi chu Covid-19 pandemic ziak ah lockdown ah kum tung ma I hi ziang tau a, hun leh tha te hung chia to in tu hin a ‘ber’ tha I hung tung to tau a, a umzia chu kumtawp I hung nai to tau a, himaleh lockdown pum pum ah le lalgam nasepnate phatak in a chia to thei zel a, lalgam ah sepkhawmpi, pastorte, upate, tual Upate leh Evangelist te nangmau zal in kochuam tin a pat in Pathian lalgam thawlawn le ahi ding gual tak in a hung lut to zel a, Lalpa lopina chang ta

hen. Kochuam khenkhat in September Beigual hi I duthusam gual tak mang thei lo maleu hen, kochuam tamzawten phatak in I mang thei ua, a kipak um ma mai. Chun I beigual uh thupi “Thianthona” ti lekhabu ah Rev. Seilunlal in phatak leh chawmkim takcha a hun guanggal hi I phatchuampi chiat ding uh ka kinem hi. Chun, district tin ah khanglaite, nute, district te kumtawp khawmpi a kimang thei na dia aw! Programme siam ding a hem, siam lo ding ti ah buai pawl tam tak um ding I hiu. Himaleh Pathian ging a, a mapuina kinem in I guanggal ua, I ginnau a thawn in ei kawi piak pua, mang thei ding ah I um tak ziak un Pathian chu pak in um ta hen.

Tu October tha a hin KSP sung ah Jubilee pathum um ding ahia, ziate chu: i) Sadar District-Diamond Jubilee, ii) Khuga District- Golden Jubilee, leh Sadar District Khristian Khanglai pawl – Golden Jubilee ahi. Ziana ding a chun article leh message ei hung zik sak ua, ka la zik ngei

a, Pathian I muan ngam nau hi lopi ka sa ahi. Chun, I khawmpi sim dan uh hi ki-awimaw ding ahi pua, khenkhat in 1959 ah Manipur Gam Presbytery (MGP) ah um lai a pat I sim pat uh ahia, zia chu KSP Session kisim dan le ahi. Chun, khenkhat in 1969 ah KSP a thak ah a hung kiphudaw zaw nung ah district kihawna ni in I lak uh ahia, zia chu le a dik a, I lak dan dan ahi mai hi. Zia Jubilee lawpnate leh I kumtawp khawmpi zosia vaihawmna leh thagaulam ah lawting tak ah I mat chiat ding uh chu ka duthusam leh ka pauchapna ahi.

Zia gual ah hun buai um kum hi ziang leh le I pawlpi budget lam le buai lo ah I sep ding te sem thei in taksa leh thagau in ma I sawn zel ua, lockdown mang phachuam in kochuam tamtak in biakin sakna, cheina leh sep ga suana'n I mang ua, sungkuan tamtak in sungkuan maicham siamna leh sungkuan ah kipawlkhawmna hun in I mang phachuam ua, a kipak um ma ma hi. Lockdown hi in biakin khak himaleh ka lunggil tempul kuaman a khak thei pua, sawlchak Paul chun "Ka mihing

taksa hi hung zawngkhal tiat tiat maleh ka sunglam thagau chu nisin in siamthak in a um zaw ahi" a ti gual in I mang phachuam ua, Pathian I pawlnau leh I thilpiak uh a chawl diak pua, Pathian bel zawk diakna leh nai zaw diak na'n I mang uh ahi. La phuaktu chun, "Nisin Jesu ka lungthim in hepi tiat tiat ing ka...ninin malai sang in hung hawi zaw tiat tiat ngei in a", a ti hi a tak ah mangtute I hung hitau a, Lalpa lopina chang ta hen, Amen.

- Chief Editor.

--o0o--

THAUGAU THIL LEH KHAWVEL THIL KIZAWP-MAT DAN

Dan 8:11-14; Tpl 3:9-10.

~Rev. Seilunlal Vaiphei

Pathian chu thagau ahia, lei leh van leh a sung ah um zosia ama siam a hia, a enkawltu le a hi. Thagau leh taksa kikawp i hiu a, i thagau hinkhua chu tisa ah i umdan un a sulang sek hi. Thagau ah titak zet ah Pathian biakna hi thilpiak in a zui ngei ngei sek hi. Mihingte'n Pathian ah i lungthim put dan latsakna dingin khawvel thil i mang sek ui. Pathian chu thagau himaleh khawvel thil tawh thuk tak in a kizawp ui – ama chu bangma zosia bulpi ahi ziakin. Zia gual ma chun mihing hile a taksa leh a thagau khen chuam thei ding gual ahi puai. Thagau lam hinkhua chu Pathian kiang ah taksa leh i thilnei piak dan in a latsak sek hi.

Mi khenkhat in paisa hi thagau lam thil in a ngai pua ah, Pulpit ah gen ding gual in le a ngai puau hi. I hiat zing taksa gual un “sum ngainat hi gitlona chitin bul a hi.” Himaleh, sum chu a ma chang in soal ahi ziang puai. I mat thiangtho chun Pathian gam letna'n matchak lopitak ahi thei a hi. Mihing in paisa ah lungawina a hawl a, kumkhua ah nei ding ah a kingai a hi chun khawk ma ma ding ahi.

Thagau lam hinkhua susia thei ahi dan i ngaitua chun paisa leh i thil nei dangte hi lau um ma ma ding a hi. Chapona leh

awchatna ten ei pui lut a, Pathian tawh ei sugamla, a neitawm in nei tam, a nei tam in a sang ah tam zaw dawina ei tut ah. Zia chun nasatak in Pathian tawh ei kigamlat sak hi.

“Dangka sum ngainat hi gitlona chitin bul ahi” ti hin taksa thil leh khawvel thil a kizawp thuk dan ei hiatchian sak hi. Ni dang lai ah Gnostic(ziltilna diklo) te chun “Taksa thilbawl bangman thagaulam hinkhua a khawise thei puai” tiin a ziltil sek ua. Zia hi mihing zilsakna a hin, Bible zilsakna tawh a kituak puai.

Sum leh pai hi a selam

ah matthei ahi zing lai in, a phalam ah le matna a tam hi. Pathian chun bangkim feltak in a siam a. Jesun le khawvel thilte chu Pathian lungsiatna latsakna'n a mang hi. Ei hawn le khawvel ah thil umte hi thagau lam thil mantam tak a ding in i mang thei ui.

i) Pathian chawihawina'n: Siamtil a pat in khawvel ah thil umte hi Pathian chawihawinan mat a hisek hi. Bible in la thil nei in Lalpa chawihawi in ti zik ahi gual in.... I thil nei bangkim hi Pathian chawihawina ding in a mat thei hi.

ii) Pathian a ding ah ginumna su-langtu ahi: "Kua le tawmcha chung ah ginum chu tamtak

chung in le a ginum hi"(Lk 16:10). "Sana chu mei ah etchian sek ahi gual in mihing chu suangmantam ah etchian ahi" ti gual in i theina leh thilnei i mat dan hin Pathian lam a i hina a taklang sek hi.

iii) Pathian ei nai saktu ahi thei hi: I thilneite kiphal tak ah Pathian kiang ah i piak chun, ama i nai ui ti phawt chianna ahi sek hi. I go umna phawt ah i lungthim le a um(Mat 6:21). I lei gothil, Pathian kiang ah i kawi ngam phawt chun, ama ei naisaktu a hi sek hi.

--o0o--

The Good Shepherd Home ah ka kimatchak dan uh

~by Ms Kimjoy, Warden

Kochuamte i na sepkhawmnau tuni tiang ah tan lou ah awl awl cha chiato zel thei ah ima'u ei puitu Pathian lopina chang masa hen.

The Good Shepherd Home ah naupangte etkawlna tawh kisai ah tamlo vak taklang hitiu. March 17th 2020 ah khan naupang pani lakbe te tawh, tuhin mi 8 ahi tau. A min teu alianpen apat in:

- (1) Mr. Genneipau - Kangvai apat
- (2) Miss Jennifer- Headquarter apat
- (3) Mr Genlianlal- Lawklaiphai apat
- (4) Miss Kimminhoi- Leilon apat
- (5) Mr Robinson- Rengkai apat
- (6) Mr Lianminthang- Leilon apat
- (7) Mr Somlalmuan- Gangpimual apat
- (8) Mr Thanggoulal- Gangpimual apat

Chuleh tulai tak ah Home ah semtu umte-

- (1) Miss Kimjoy- Saipum (Warden)
- (2) Mrs Kimlalthiang- Saipum (Helper)

Khawvel buaina ziakin March thakim apat in naupangte le School kai thei talo in a umthakte le admission bawl thei talo in i um ua, In mun a thei dandan in Pathian mapuina zal in nitak lam 2:00 pm - 4:00 pm kikal home tuition ka bawl zing thei nalai ua,

chun Biakin kikhawplo nitak sin in Insung maicham ka bawl zing ua, insung maichambu kha sim in, pa-kna la sa di leh thuthungthak bu sim tha di kiguat lawk sek in, Lalpa pauchapna hun ka la mang-chai sek ui. Sunday zingkal dak 6:00 a.m leh Biakin ah Devotion ka pang sek ui.

Zan kikhawp zaw leh Bible simna ka nei sek ua, Miss Kimminhoi in Thuthungthak bu vel ni a sim zo tai, a dang ten le a simzo vâng chiat ka hi tau. I bawl thei um sun chu lamdik kawkmuleh thilpha bawl ah lampi kawkmua ahia, aga suasak thei chu pa Pathian ahiziakin, ama kiang tut thei dingin Lalpa'n i pauchapna-teu ei ngaithak piak zel taken.

Zia bang hun haksa kikal ahin tuni tiang in Home visit di mimal hileh pawlpi hileh a um zing thei ziakin Pathian lopina i pia ahi. Ama lopina dingin gen zel lehin, January 2020 kipat tutha(September) tiang in Office

lam ah Anchang man di kala kha
nai puau hi.

La pauchap nau leh pan-
pina zal un tuni tiang in dam tak
in ka khawsa zing ui. Malam ah
le la pauchap nau ka ngaina
zing ui.

Lalpa Pathian in thawtute
sum leh pai, nek leh chak hileh
pauchapna leh thil dangdang
Home a dinga pan latute zosia
malzawl in umpi zing taken.

Chuleh, apang thei nailo
ten le pan lathak chiat hitin uh,
damlai ni abeima hin, semhat hi-
tiu Lalpa na, hun adang tai, vai-
hawmna ni la.. anai deudeu ta
ngal ah

--o0o--

JESU KHRISTA HINKHUA APAT ETTON DING PATHUM TE

~ Pro Pastor Pauneithang.

Thupatna-

Pathian in a chate leh khawvel mite zosia'n a lunglam leh akipakna taka hinkhua a matthei na ding ua, etton dinga atup pen leh dawwipen chu I Lalpau Jesu Khrista hinkhua leh nungchang apat ahi. Mi khenkhat chu Mosi gual a Pathian matchak ut, khenkhat chu Elijah te, Elisha te, Paula te gual a Pathian mat ut bang um ahi. Ahin, I lungthim a hiatzing ding khat chu, Pathian kipaknapen chu I Lalpa Jesu Khrista kimatchakna leh hinkhua ahi. Paula'n le Khrista a etton banga, mite'n ei enton uh hen ati ahi. Point thum in, I Lalpa Jesu Khrista hinkhua a Vaihawmtute bang gual in a koi/gel em? Mizosia khenchuam neilou ahidan leh, a hinkhua phatsan (betrayed) a aumna banggualin a tuak mualsua em? Ziate ahin enkhawm hitiu.

1. Jesu'n a hunlai in Vaihawmtute a ja ahi.

Jesu'n zia hi a hechian ahi, ama Pathian Chapa ahin, khawvel a mihing zoisa sang a he zaw leh ching zaw leh thiam zaw ahi. Ahin, Jesu'n a hun laia Roman government Vaihawmtute a ja ahi. Mite haw a hung ua, Kaisar kianga tax piak ding leh piak louding chung chang, a hung dawng ua. Jesu'n a dawn-butna chun, **"Kaisar thilte chu Kaisar kiangin piau inla, Pathian thilte chu Pathian kiangin piau in" ati ahi.** (Marka 12:17)
"Mitin a chung ua thuneite thunuai

in um chiat uh hen, Pathian ah kipat longal kuama thunei in a pang ngai puau hi; thuneite hi Pathian guat a hui hi. Ziakiakchun, lungnatna lauziak bep hilo in, sia leh pha hetna ziak inle thuneite thunuai a la um diu ahi." (Romte 13:1,5)

I Lalpa Jesu leh Paul in le Vaihawmtute a ja'u ahi. Nang le kei inle Vaihawmtute I ja ding uh ahi. Ahi Vaihawmtute ja na ziakin, I gam ua lock-down a hung bawl uh le, phatakin I nit uh ahi. Covid-19 lau ziak a le hintin, Vaihawmtute thupiak ahiziak a amau ja ziak a le ahi. Tichun, mi chuam chuam, sakhua chuam

chuam I gam ua um maleu hinle, dan leh dun (law & order) kitup tak a um thei ahi. Nang le kei Pathian hing houte hi, Vaihawmtute thu mangpen ding leh, thupiak zuilou te le, thupiak zawm dinga ziltit tu i hiding hinalai ahi. Suapi, I pawlpi KSP gensetu la hizing nalai em? Pawlpi hotute gensetu lahi zing nalai em? Kochuam hotute gensia tu la hizing em? Tuni apat gensia ta kin. Kochuam hotute hawle phabukim lou ahiu, sukkhial le a neisek ui. Phabukim leu nang le hung houpi ut lou maithei eu veu. I pawlpi/hotute'n Kochuama a mopuak nau apat, ziltitna leh kokmuna a nei teu ngaisak lou a, hel a um lahi chun, nang le la thugen leh ngaidan a, la kiang la tuam a umte a hel hun un, gending neilou ding lahi.

I Lal Jesu'n Vaihawmtute a ja gualin, en le Vaihawmtute leh chungga mite I ja ding ahi.

2. Jesu'n kuama khenchuam a neilou ahi.

Jesu'n kuama ahina jat le nam in a khenchuam pua, Pawsal leh numei hina in a khenchuam pua, hausat leh chatga in a khenchuam puai. Chuleh, Jesu'n mi a mel latdan in a khenchuam lou

ahi. *“Ziatak a chun Juda mi a um ta pua'n, Grik mi le a um ta puai; Zia chun suak a um ta pua'n, suak lou le a um ta puai; chuleh, pawsal le numei le a um chuam ta puai. Khrista Jesu ah chun la leng un pumkhat la hingal un.”* (Galatia 3:28)

Paul ngei le Jesu Khrista a hung muchian tak tak phatin kuama khenchuam neilou in, Jesu gual in mizosia kibang tak in a koi thei ta ahi. Jesu'n dawisak chuam, khenchuam, musit chuam umna mun a chun Chondan/Tradition bang le a usia tawp mai zel ahi. Juda te'n Samarite hi nam niam atiu a, a musit uh ahi. A hou le a hopi ngai lou uh ahi. Juda mi hin Samarimi hilehle, Judate'n numei a musit nau a nasa zaw sem nalai ahi. Himaleh, Jesu'n Chondan/Tradition chu a usia'n, Samari numei, zawntat nu chu a holimpi ahi. Zia numei nu suknomna aum na chu, amasapen in Samari mi ahi namniam. A panina in Numei ahi. A pathumna in zawntat ahi, Mosi sakhua dan a suanga selup thei ahi. Chondan/Tradition in a suknomna, ziaban a Sakhua dan in le a tawsawt (support) ahi. Himaleh, Jesu'n a holimpi in a hinkhua thilte, chun a hinkhua a

theng danglam piak ahi. Tichun, numei chu suknomna ahina apat a suakcha ta ahi. A jachatna zosia kipakna, hangsanna leh zalenna a chang ta ahi. Khosung lam a tai in, mipi tamtak Jesu kengbul in a hung pui ta ahi. Samari Numei, zawntat nu chu chomkhat sungin Jesu'n Evangelist in a siam dawk ta ahi.

Peter in le hiti hin a gen ahi, "Tuhin Pathian in mi doichuam diak a nei puai ti kichian tak in ka hetai" a ti ahi. Gentel mi Kornelia te inkuan a hung piangthak ua, Thagau Thiangtho a hung chang phat ua khan.

Jesu'n kuama khenchuam a nei puai. A nungju Peter leh Paul inle Thagau Thiangtho a hung chang phat ua kipat khan, Jesu gualin kuama khenchuam a nei talou uh ahi. Nang le kei inle kuama khenchuam, lang leh sik nei a kuama nei louding ahi.

3. Jesu'n phatsan (betrayed) ahi lai in, lungngaina akizaw sak pua, thukkit nawpna a ki zawsak pua, a hung tung ding thilpha lianzaw a thil zaw ahi.

Jesu'n zan ann nunungpen, a nungzuite tawh a nek-khawm lai un, hitihin a gen ahi, **"Titakzet in ka hil la hiu, ka ann**

nekpi, la lak ua pakhat hi ei matsak ding la hiu," atia. (Marka 14:18)

Jesu'n ama matsak ding pa, a taksanpen pa, Juda Isakariot, ama hung phatsan ding chu a mu in, phatsanna beliam te, a natna te haw khelpek a, mizosia a dinga hukdamna hungtung ding chu a thil zaw ahi.

Mihing khat tuak dinga, huaisiapen iti diam, musitumpen iti diam, aloleh kilep bawl chung chuang pen iti diam chu, Juda Isakariot in Jesu biangchop (Kiss) in a phatsan ahi. Jesu'n a phatsan tu Juda chu thukkit a gua pua, Juda Isakariot in ama le ama, aki susia ahi. Peter phatsan lai a le, Jesu'n Peter a koichuam diak puai. Peter in a ngaidamna leh Jangaina a dona, tichun siamthakin a um kit ahi. Zia bep chu hilo in, Pentecost ni main Speaker in a pang thei ta ahi.

Suapi, Jesu phatsan a hinkhua mang kha lahi lai in le, Peter gualin a ngaidamna leh jangaina chang dingin hangsan takin Pathian jangaina lalchutpha lam nga le chun, siamthakna leh malsawmna chang ding lahi. Chuleh, Suapi la kinaipi latakkan ma ma khatin a hung phatsan leh le, Jesu hinkhua apat zil ding in

kisa zousa'n um in.

Phatsanna tuak te a dingin: Phatsanna(betray) hi phatsantu a dingin a pawlam ahi; ahin phatsanna gu(bitterness) ahileh vang sunglam apat a zung um ahin, giltak leh hinkhua suse thei hat tak ahi. Phatsanna chu min la chung a bawl ahin, maleh phatsan a um tu chan chu, gu a sunga um, ama leh ama kibawl gual ahi. A sangtel in phatsanna apat a suakcha thei un, ahin, mi tawmcha bet phatsanna gu(bitterness) apat a suakchau ahi. Jesu a hinna neite I vangphau ahi, Jesu hinkhua leh nungchang apat I zil ding uh ahi.

Thutawpna

Suapite, I Lalpa Jesu Khrista khawvela a lenlaia, a hinkhua kimatchakna apat in, nang leh kei in le bang gual a khawvel vaihawmtute ja ding

dan te, pawlpi leh kochuam hote ja ding dan te I he tau ahi. Zia ban a chun, mi kuama jat le nam ahem, numei le pawsal hina ahem, hau le vai in ahem leh latdan a, mi kuama khenchuam neilou a, kibang taka mizosia et/ koi ding ahidan le I he tau ahi. Chun, mimal a le, I loi le pai, innkuan u le nau ahem, I suapi ahem apat phatsanna tuakte zosia a dingin le Jesu phatsan a um na apat lungput leh nungchang gual a zaw theina, I he tau ah, ziachu neithei dingin Pathianin hun mal-sawm ta hen. I hinkhuau a bangkim a I Lalpa Jesu Khrista, Pathian Chapa hi enton a, I khosak zel diu ahi, Pathian kipakna leh lungawi na lama hinkhua mazel dingin, Pathian in I mau hung pui chiat ta hen.

--o0o--

Ka hatlo phat sin leh, ka hat sek ngal a.

(2Korinth 12:10)

~Upa S.T.Liana

Zia thumal kampau hi mithiam leh mifel sawlchak Paul taksa hatna, taksa felna, taksa pil velvekna kithuama, hun leh phat mang a, thiampu, hotute pachat law ah phat amat, Jesu khrista tawh Damaska dai ah akituak zaw nung ua, Lalpa Jesu Khrista nasem ding ah ahung kipiak nunga. Taksa hatna tasam leh basap na tampi a tuak nung ah akampau hung pawt, gingtute thagau lam a malsawmna thuguk phatak thumal chu zia hi ahi Paul in hitin a gen ahi.

Khrista thilhitheina chu ka chung ah aum theina dingin, kipak takin ka hatlonate hi suangzaw tang ka. Ziakiachun, khrista ziakin hatlonate, hosiatnate, chatganate sukgentheinate leh buainate ahin ka kipak sek hi; ka hatlo phat sin leh ka hat sek ngala, atia. Ka naupan lai apat in kanu leh ka pa Pathian awilo hizing maleu, Ute thalim nuai in Pathian ka awi a. Khristian hi in KSP Lingsiphai in Upa Lallianzui upatna Biakin in kikhawm in Pathian thu ka awi uh ahi. Zia hunlai chu naupang khangdawng lai, thahat lai a kihia. Thawlawm kuan, khristmas thingpuak chuleh khristmas a ding Sial kai in Mualkui khaw lam in ka kuan ua. Thahat lai ahi, anawp in a lim um khawp mai. Damlo leh hitan umlo. Zan khawvak i lenkhawp

leh dap isak leh tummeipi awi himai, a nawp himaleh kumkhua nunnawp ahi mai hi. Pathian pak leh nunnawp festival pawl a hi. Zia te haw hun zosia kha hatlai ahi, maleh hatlolai hun ahi ti ka ngaitua dawk hi.

Khawvel a hat leh pil kiti lai in Pathian in a mimat dingte a hatna zosia a lakpiak masak bangzat ahem te pat in zillai vak en hitu aw. Abram in thupi tak in gal azo ahi. Pathian inle thupitak ah amalsawm guat lai hun in, hunkhat chu a suapipa chapa Lot Sodom phaizang ah cheng chu Lal(king) 5 in khawpi hung bulu in a gal mat ua, a puimang uh ahi kha. Zia hun khan Abram in a private volunteer body guard mi 318 te tawh ava hukdawk a, Abram taksa lam ah gal hang mama khat ahi. Pathian in tha-

hatna kisuanpi ding haute haw tawh bangma semkhawm theilo ahi. Kum leh hun te chia zel in Abraham kum 100 bang ahung hita. A taksa le hung hatlo ta. Maleh Pathian in nam thupitak a hung siam ding ka hi ti kampau a chung ah gen chu la tung tadi lo. Abraham leh azi beidawng takin a um tau ahi tia a tuanthu in imu uh ahi. Ahingut hi Abraham tek ta, hat talo, ahi nung in Pathian thilbawl hung kilang bep pan ahi kha, bang ziak a diam Pathian ahiti vaigei hi..! la ngaitua kha em? Americate President elect ahi phat phat leh President hi ziang nailo, President di'a telting Office lua nailo tina a hi. Mosia le kimuang mama hina, nikhat chu mikhat a that ahi kha!. A ki muanna'n a subuai a, gamdai in kum 40 training ah nisa leh gawpi nuai in ahun ahung mang ta, zia takzet chun, bangma lo in a kingai hun in Pathian in a hou ahi kha. Thupi a kisak lai in Pathian lopina a chan lam imu lo uh ahi.

Zia gual ma chun mihing amau hatna leh kimuanna nei mi pha bep te haw leh a bawl theina ahung siat gawp dikdek phat ah Pathian thilhitheina hung kilang bep; Paul, Jakob, Danial

leh Josephte ahi. Bang ziak ah Pathian hin mihing hatna dawilo a diam? A ziak chu mihing lam ah kisaktheipi ding a tam tak leh Pathian in mun a chang thei pua. Pathian a pau ngam lo ahi.

Pathian in a mite haw hi ama lo ah hithei lo ti ahung kihiat tak uh leh, Pathian kipak sek ahi. Amamaw uh ape sek ei vei...!

Awle, zia gual chun Joseph le, gualleh leh musit pampai simmaw thuak in, suangkul sung in a hun amang a, bawlthei hithei anei ta pua. Pathian in pilna a pia, Lal thupi ahung hi kha..! Joseph in zia gual achanna dinga thuak ahilam kihele chu, zia sangga nasa zaw le thuak nuam ina maw..? Kei la aw bang hem a um le kigen thiam ka gua, ka chawl thei khawp mai hi.

Awle, gual zolo hinkhua manphat dan leh lawkdan chu phabep i gen tau a. Egypt lalchutpha a kichu vaihawmtu Joseph dawng le'n, aman gualzolo hinkhua a palto dimdem sa ahia. Tuni lawtinna ka chan cheng cheng ka pa insung ah ka Ute apat leh Potipher Inn sunga azi ziak ah ka mualphona leh ka gualzawlona ga ahi, ti dingin ka gingcha ahi. Hiti gual lawm a

malzawlna'n ei zui ding lam he
le'ng ala thawk be nalai ding hi
ve'n, ti'n na e, ka ti ahi.

Awle, Unau achang leh
Pathian chate a di'n guallelna te

zachatna kiti haw hi chan ding
ahi. Thudik a guallel la hileh,
malzawlna'n hun zui ding ahi ti in
ding det in.

--o0o--

DAMNA AW ngainatute kianga

Article kona

23rd September 2020

DAMNA AW ngainatute zosia chung in kipakthu ka hun gen
hi. Chun, Article ding hi thacheng ah tarik 20 tiang ah a nuai ah
contact no. kipia ahin, submit zing thei hi ding ahi. Kuale i tawmn-
gaina chungun tawmngai sua sawnsawn dingin i ki chial ui.

Lalpa'n simtute malzawl zing taken.

~Editor, 7085518659.

Pathian tawh kigui zawp zing (Connecting with Jesus)

John 15: 4-5

*~Evan. Miss Kimbawi Vaiphei,
Believers Eastern Church*

Amasan Damna Aw simtute zosia laleng un l Lalpau Jesu min in Chibai! Tuni hin ei gingtute a ding a Pathian tawh kigui zawp aphant chuam dan hi ihiat sau ahi na chung in athak in vak enkhawm kitleu hin kad-awi a aziak chu keima hinkhaw ah Pathian tawh kaki gui zawp nau ah ka chung ah thil tungte hiatkhen khat kanei a zia chu gen ding ihi.

Thagau a ga suate chu kuate ahiu em?

Keima hi grep guitak chu kahin, nang uh a bakte chu lahiu. Kuale keima a um ah, keile ama ah ka umna chu, zia mi ngei chun ga tampi ahun sua sek hi. Keimalo in bangma lahi thei puau hi. John 15:5.

Zia Bible chang in ei gen pen chu Thagau a ga ding tihi ahi. Grape hi kiphu henla ga talo in um taleh akan natna bangma um keilo ding ahia, sat thak a mei a hal thak ahem, paimang ahem lo ngal chu. Ahin, grape chu apitin a ahung ga ahi chun kumkit phat leh aga hoi zawk sem na ding in hoideu in i-etkawl/i-jen ngai ahi. Zia gual machun Pathian in gingtu hitate Thagau ah ga sua ding in eidawi ahi.

Thagau ah ga sua nading in bang bawl angai em? Nang

mau ah ka um zing gual hin, keima ah um zing un. Bâk chu a guipi tawh a kizawp lo leh ama ngawn ah aga theilo gual hin, nangmaule keima ah la um zing lo ua leh ga thei puan lau.. John 15: 4.

Thagau ah ga sua thei nading ahin Pathian tawh iki gui zawp zing angai hi.

Pathian kianga panpi na dawt angai hi. Kua le gingtu hingal ah Pathian ah a umlo a Pathian nai ah umna chang ahi-atlo chun ga asua ngai puai. Mi tampin Pathian nasepte bep in asepe ding ua kiging cha kigel maithei ahi. Ahinla hilo ahi nang leh kei le khawdang gamdang in vachia khel lo lehin le i-insung inle Pathian na isem thei ahi.

Zia igen zing lai ahin keima mimal ah katuak leh kahiat

khat chu kei hi (Believer Eastern Church) langol laimanai ah Bible zil kahia ka course chai ahin (S.O.C) Sister of Compassion in Kerela ahin ka loite pani tawh chia ding in ka um ua center lam ah pat kha kuama kithak (dropping) umtalo ding a tiu a. Kei uh chula sappau kolpau he khuk le ki um lo. Ka chia khak na leh vak khakna ahilo ziakin beidawng chu a um ma ma hi, ahin la ka lungmuangna khat chu Pathian in ei panpi ngei ngei in ah tihi ka kinepna leh lungmuangna pakhat chu ahi. Pani na chu ka U hi ka insung ua ka kinep pi pen sappau, kolpau thiam, computer le vak thiamtho kit nana chu gal gam inle ei guide thei di kawm, tihi ka kinepna pani na chu ahia. Hun a hung chia zel a Kerela kachia nading chu ahungtung ta Pathianni a hia. Ka chia ding ni'n Rev. B. Lala'n thamuan um tak pauchapna eihung neipiak a, Biakin ale einei piak kit nalai hi. Ama hi taksa leh thagau ah ka ettawn mama khat chu ahi. Chun pauchapna a neizaw in inna a pat kahung kalsuan dawk ta Quarter inn a ka u kiang kibang a thil umdan gen ding aman eihil theiding ti kha kalunggel chu

ahia. Singda katungta ka u chu chutna chung in akizam ah a ipmu ka kaitho ah u chia di katai hungtho in kati leh i atia a hungtho mawng mawng ta pua, ka chia phat chula a nai deu deu ziang ta ahung tho lo phat in khatvei ka kaitho kit a atho diak ta pua. Chun hun chawmkhat chu bang ma gentheilo in ka mitthi ava chut chut ziang ta. Chun ka ngaitua na'n til chuam chuam ahung kilang ziang ta. Zia kalung ah hung kilang chu ka u hin Kerela ka chia di hi eiphatsak lo ziak a dia aw ahilo leh le numei kahia Pathian nasep di hi ei phatsak lo a hi dia aw ti lunggel nei in mitthi pum in kaki pandok ta. Ka loite tawh office in kaki mu tua tau a. Lawi upate chun kei chu kalak ua chun eivak suan deu pen uh chu hiding dan kahia. Kenle kaloiteni chutawh kol pau sap pau kahi-at dan dan a tho in Kerela chu damtak in katung tau a. Ka tunung ua hin keihi kalung chu a nuam ngai him him pua mite ma in kipak tak leh lungngai lo gual in ka um sek a, ahin kalungthim achu ka u hi a um zing ziang a. A ziak chu ka insung uh kha ama ziakin adam paw ma ma a. Zia ka lung a kagel chu bang ahem

ti leh keihi migual in hiatna, chit-na neilo in midangte Pathian thu a pulut zolo maleng ka innsung ua hin kei ma'n pan kalak lo ahi chun buai ding ahi ti in, kal khat sung ahin thumvei(3times) hi an ngol in pauchapna kahung nei panta. Kum chu a hung chia zel a nikhat hi kapa tawh phone in kaki ho ua, ka u LWC a umdan thu a hung gen ah. Sum leh pai le sen ngailo in Pathian thahat na'n a etkawh uh a hi dan agen ah, zia thu chu kahiat in kakipak ma ma a Pathian kiang in ki pakthu ka gen ngal hi. Kum ahung chia zel a Kerela kum thum ka um sung in Pathian aphot dan chu nidang a ho pi theilo, ho ngam le hilo, i mu leh le kichat chat um ziang sek pa khan Lal Jesu a hukdampa ding ah ala kisan tak achun a nawp dan dan chu a tepi di beihial khawpp in ahung nuam ta mai hi. Kikhawpna lam, nasepna lam ahin ahung tawm ngai mama ta. Insung, khawsung leh tangsung hileh a sulim mama ta ahi. zia igen nuam chu Pathian tawh I um khawm , ipan khawm ahi chun bangma ahitheilo umlo ahi.

Kap kawm ah buchi tu ding kuandawpите chun a buphalteu

chawi ah lim lasa'n inlam zuan kit in nau. Sam 126:6

Milian milal hi nading ah pan nasa tak lak angai in, kiham bawl angai ahi. Kiham bawl na leh kukalna a umlo chun bailam tak a kuama lawting hi um ngailo ahi, ti ihia chiat ui. Zia gual ma chun nasemtu tehin le buphal i chawi nuam ahichun a dep lumthei ding, ling leh khaute, hampa lohingte kha sukthian piak angai zing a, i-vethak zing angai hi. I ethak zawlo a i-thaw zawlo ahi chun, buphal kiluak ngailo ding ahi tihie chiat uh ahi.

Ei KSP Kochuam chia lai lampi hi vak en leu hin, hatlo leh basam mama, taksa leh thagau ale hatlo mamate ihu ihe chiat ua, ahat khat leh ni vang ki um maithei nan a. Ahin atam zaw vang hichu ihat puau kiti le kigen khial din ka gingcha puai. Ahin hatlo kisak ziak in kochuam dang vazawp/vabel ziang ding le ahi diaklo ahi. Zia ivak gen nawpna chu nikhat hi mi pani akiho lim nau ahin, ei haw hile kochuam piting deu te haw hitawh ki gui zawp kihile neu khat hile taksa leh thagau ale neukhat kihit ding ahia atiu a. Zia gual ma chun midangte le zia gual lungthim nei

hi ki um maithei ding ahi. Keile akiho lim nau kahiat in ka lungthim in kala pawmten hi. Himaleh zia gual lungthim kanei zing lai achun, ka ngaituana hung kilang khat chu masanglai ah Missionary masate khale ahausu, apitingsa kua'ma umlo, gentheina, haksatna chuam chuam thuak pum ah hung khawsa ahidan uh kha ka lungthim in ahung kilang vawng vawng mai hi. Kochuam dangte idem, i dawilo na vang ei puai. Kochuam iva chawn man ah khan kihit ziang, ki piting ziang ding le hidiaklo ahi. Ziaziakchun, i-kochuam hi ahat puai tia mawk

um ziang mai loin mitthi pum in Lalpa kianga pauchap hitiu in, eisuhatlo thilte, i chung ua bek gitlo nate hi silthiang in Pathian tawh i ki gui zawp nateu hi sudet in suhat thak kit leu hin atawpna chu kipakna hung hingei ngei inna tihi ikinepna ahia, Thagau in ga sua ngei ngei ding ihu.

Achaina ding in, a chung ah i gen gual ngei hin Pathian tawh i-nisin hinhua hin haksat ni hihenla, kipak ni hi ziang lehle Pathian tawh kigui zawp zing ah um thei ding in simtute zosia Lalpa'n ei malzawl ta hen...Amen..

--o0o--

THIANGTHO NA

~Upa Ginneithang, Saipum

2019 kum in B.P stroke leh Zunthum san ziak in Chiathei lou leh tawithei lo in ka um a. Bang ka ti dia aw ka ti lai in. Kochuam te lei pauchap piak na zal uh leh dawisak tut e pauchap na zal in Pathian in hanta thak ei pe kit in zia Damna Aw mangcha kipak thu gen thei dinga ei puitung tu Pa Pathian chung in kipakthu ka hun gen masa ahi.(Hallelujah)

Tukum 2020 Beigual Thu-
pi I mat uh Thianthona ti imat uhi hawi ka sa ma ma ziang hi. Zia hi simtu zosian I mat thei ngei na ding uh leh phatchuampi thei ngei na ding un ken le neu khat ka hun zik hi.

2Korinth 6:17-18 “Zi-
aziachun, alak ua kipat hung pawt unla, achuam in um un, Lalpa’n a tii. Thilbuak him him khoi kiu in, chutichun, hun lop ta’ng ka tin; nang uh dingin Pa hi’ng ka tin; nang uh le kei a dingin chanu chapate hi’n lau; Lalpa bangkim hi’thei chun a tii”

Zia thu pansan in vak houlim leu hin ti ka nawp chu, kochuamte hi phatlona leh thudiklona, Ginum lona milim houna leh a dang dang apat kikoi thi-angtho ding in Lalpa’n ei doi hi ti ihu a, Lalpa’n a thisan ah ei tat na hi mawk mai ah ngailo in,

ei mau hinkhua diklona zosia nu sia a Thiangtho tak a ko I hi nau ahin Kochuam ten I maw puaknau hi su dik in Lalpa dawigual a um a ama nasep hi ahi. Athupi pen chu Kochuam ten I hinaw ki hemil in Lalpa dawigual hi bang ahem ti ngaitua lo a I um nau hi, Lalpa lungngaina ahi ti hian acha dawitakte gual in Ama um dan la mite hi ding in Lalpa’n ei dawitahi.

Babulon sal a tang Isra-
el tangval pali(4) te gual ah kochuam te hi Lalpa Gitlona suak apat pawt a Hangsan tak mai a phatlona, I Pathian dawilote ei un le dawit lo ngam ding a hangsan tak mai a pang ngam leh kikoi Thiangtho ding in eidawitahi. Babulon ten zu leh sa a lui piak lai un ane, adawn puau a amau sang in ataksa uh apha zaw ahi kha. Lengpa Nebukadnezar lim ma a bawkkhup leh hoding, abawl lo

lo, mei lak a selut(pailut) ding a tilai un leng thupiak chu anial tau a Lengpa'n a het phat in alungna talua meipi kha ale sagi sa ding in tik un atia. Meipi seplut dingte nasan a hull um hial ahi. Mi pathum ahi apai lut uh chu Himaleh a lak ua mikhat apansa hi ti imuu ahi. Zia gual achun hangsan leh ginum taka pangte lak

in Lalpa aum hi ti hian kochuam l hina sudik hi tiu. Lalpa l kiang a aumhi ti hia kikawi thiangotho in Lalpa lawp, chanu leh chap ate hithei ding in kiko i thiangotho hitiu.

Simtu Zosia Lalpa'n hun malsawm ta hen. Amen!

--o0o--

Bible pumpi ni 17 sunga simsuak

KSP Kochuam Belampu Upa Pachek Gangte (84) of Phuaisanphai in Lockdown sunga Pathian tawh kipawl na lemchang ah la in, Bible pumpi ni 17 sungin a simsuak hi. A Bible simna a tamzaw hi mitval bei ah asim ahin, Bible pumpi hi Gangte pau ah 3vei, Hmar pau ah 1vei leh Lusei pau ah 2vei ala sim suak ta ahi.

Kum upat nunga zia gual ah Pathian ah a kipiakzawna hi khangthak ten ettawn tâk tak ating ahi.



[A simpatni :- 13th May 2020]
[A simzawni :- 29th May 2020.]

THO INLA, LA PATHIAN KO IN

-Rev. Thanglianmang

1. Pathian apat Jonah zam mang dan:

Tuni thupi itel uh “Tho inla, la Pathian ko in” ti thu hi Pathian zawlnei Jonah kiang ah Lawng-pu lian pen in ahun gen ahi (Jonah 1:6). Jonah chu Amittai cha-pa ahin, zawlnei neu 12 te lak ah pakhat ahi. Jawlnei neu akitina ziak uh chu Pathian apat a thil mu teu a tawm ziak leh a lekhabu-teu haw le a tamlo ziak uh ahi. Jawlnei lian kigente haw sang ah a nuainung zaw’u tina lampang vang ei puai. Tichun Pathian thu chu Jonah kiangin zia gual hin a hungtung in, Assuriate khawpi Nineveh a chun chia inla, a gitlonau sim dingin va gen in, a simlo ua leh ni 40 zaw leh sumangthai ding ka hi ati ahi. Ahinla, Jonah chu Nineveh khaw lam ah chia-ta lo in Joppa khua a chia suk in, Tarshish lam zuan ding Lawng khat ah chun a chuang zaw tai. (Pathian thupiak manglo ah Pathian ma’ah zam mang ziang hi khenkhat gendan in Assuria te hi apa thattute ahi ziak ah Pathian in a gawt dingah adawi ziak ahi atiu ahi). Chutichun, Lawng ah

chun a chuang a, Lawng sung-gil lam tak ah chun tui tak in a ipmu tai. Pathian in Jonah ziakin Lawng chu thigawpi nasatak in a chawbuai sak in, a suse gaw ta, Lawng ah chuang zosia te chu lau in a Pathian chiat uh ko in a buai tau. Lawng ah van zo-sia chu Lawng jangkhainga ding ti in tuisuagiat ah septha maleu le thigawpi chu a hai chuam puai, a ziak chu buaina siamtu Jonah chu a chuan ziak in ahi. Lawng ah chuang zosiate chu thi ding lau ah lungkham takin um maleu, Jonah chu vang Lawng sunggil lam in Lawngpu lianpen chu ahung ah a kiangin “Aw nang imut thut-pa, Bang bawl la hem? Tho inla, la Pathian ko in, i manthailona ding un” ahun tia. Himaleh Jonah in vang a thugen chu a dawnhu pua’n, a Pathian le a ko diak lou ahi. A dinmun in a ziltaklo ziakin Pathian kiang ah pauchap chu vang a bawl thei ta puai. Tichun Jonah chu kipuanglo maleh, Ai asan ua leh ama chungin a chu tho tho hi. Tichun Lawng apat chun tuisuagiat ah apaitha’u in, ahileh thigawpi chu a hai

tai. Ama paithak nung ua chun Lawng ah chuante chu nuam takin a um thei tau. (Gingtute vang Jonah gual hilo dingin Pathian in ei dawi ah, i khawsakna zosia ah mite buaina tuntu hilo a, midangte a ding ah malzawlna hi zaw ding i hui).

2. Jonah hun tawh tulai khawvel dinmun:

Jonah chu Tarshish lam zuan ah Lawng ah a chuan ah, thigawpi nasatak ahan ah abuai gual ua khan, i chennau khawvel hile Lalpa ni lopitak lam zuan ah akitawp lai in Corona virus natna in mite a chawbuai in i um tau. Zia natna lau um tak ziak ahin khawvel ah miching leh mimawl leh mihau leh mi gentheite zosia kibang takin chaw buai in a um ta. Mi sang tamtak ten a hinnau a mansua zo tau hi. Khawvel mipiltan le a damdoi ding muzoloban ah, khawvel ki vaipuakna zosia chaw buai in a um ta ahi. Mitin in zia natna pat bitna ding ngaitua chiat in hinkhua a kimang tai. Pathian in zia natna hi bang tik leh a lakiang ta diam? ti vang hiatthei ei puai. Ama huntiam khawvel tawpni tawh a kizawm ziang ta diam ti le hiatzaw ahi

talo ahi. A bang hileh Pathian in hun nunung lam ah thilhungtung ding ah a guat chu atung ahi mai tai. Pathian vaihawmna ziak ah natna hî leng ahi zia kin a siam sa mihingte kuama'n adal thei puai. Ama kiang ah pauchap leh kituklut chu ihi thei uh um sun ahi mai hi.

3. Tuhun ahin tho a Pathian ko phat chu ahi tai:

Jonah chuanna Lawng chu tuisuagiat ah atum mang vâng vâng gual khan, i chennau khawvel hi Pathian in a sumangthai vâng vâng tai ti hi hiatthei ahi. Dinmun lauthawng umtak ah ding ihi tak ziak un, Pathian hukdamna Lawng ah i chuanlut thei na di'n tho ah, Pathian ko phat laitak ahi. Noah hunlai ah Pathian in khawvel a sukmanthai hun ah, Noah ah te inkuan Lawng ah hukhinna a chan gual ua khan, i sungkuan chiat ua hukdamna chang di'n kisingsa'i ti'u. Pathian in khawvel ah natna hîleng hi a lakdawna ding ah ama ko hitiu tina lam ahi puai. Mi zosia ama kiang i tun theina ding ua gitlo sim ah, ama ko in ama lam zuan hitiu tina lam ahi. Pathian chu a chate pauchapna dawnhutu vang

ahi nai, ahinla ama thupuksa a phelkit lou chang Bible in mun tamtak in mu ahi. Etsakna dingin, Pathian in ka lungthim gual pu ati hial, Leng David khale a chapa damna ding ah anngawl hial ah pauchap maleh a lawting diak puai(2Samuel 12:16-18). Thuthungthak ah Missionary thupipen sawlchak Paul khale Pathian in a chung ah ling a kawi lakdawna dingin thumvei hial a dawt vangin a lawting diaklo ahi(2Kor.12:7-9). Ziakiachun, gingtuten khawvel ah mihingte natna pat damna ding ah dawn dawn leu hingle, Pathian thutep guitung ahitak ziakin, Pathian in lakianglo mai thei ahi. Lalpa Jesu thugente guitung ahi tai. Tak-sa damna ding mai dawn lo in, thagau ah mi zosia damna ding dawt zawk ding ahi. Khawvel ah thiltung imu leh i hiat teu apat hin mi zosia thagau ah kisuktup a, Lalpa Jesu lamtua ding ah kizazosa um ding ahi. Pathian thil hitheina thupi tak muzing ngal ah lungthim khautak pu zing Leng Pharoah gual khan um gaw puai tiu. Leng Pharoah khan le Mosi manga Pathian thilbawlte kha mak asa, alau in, ahinla Pathian lam anai diak puai. Zia gual

ma chun Israel chate le Aigupta pat Kanan gam a zawt lai ua khan Pathian puihuaina mak tak mu maleu, Sinai tang bul ah khan bawngno lim ho in Pathian a phatsan ui. Chutichu ahi ziakin, Pathian in a chate a ding ah vangam ei siam piak ahin lut ding ah kisingsak hun ahi.

Ziakiachun, tuhun ahin mi zosia'n i chennau khawvel buaina lak ah pat hin hukhin ah i um thei na ding ua tho ah Pathian ko phat ahi. Jonah gual a khan i chung ua tung ding manthaina kawtbul ah ding zing i hi lam uh hepha lo ah um puai tiu. A vaigei ma hin la Pathian chu ko in. Mu bailam ah a umlai in Lalpa chu hawl unla, a nailai hin ko un, mi nunsia chun a siatna lampi chu haisan hen (Isai 55:6-7).

Lalpa lopina chang taken.

--o0o--

The Good Shepherd Home Fencing Siamzaw thu leh Pan lak Khawm Dan

~by Nu Tingnu,
Secretary, PWF (KSP)

Home a ding Fencing Siamna bangma buaina um lo ah ei zawsak tu pathian chu lopina l piau ahi. Achasa Date 20th July 2020(Monday) nipat ahin 31st august (Monday) ah zaw thian ahi. Chuleh, Fencing siam nasep na sum leh pai, tha leh zung hung seng zosia te chung in PWF pumpi sik in kipak thu ka hun gen hi. Pathian un la pan lak na zosia hiatpi in hun malzawl chiat ta hen. l pan lak khawm dan tangpi te chu zia a nuai ah gual hi ahi.

1. Fencing siam pawimawna ziak ah project Board panlak dan-

The Good Shepherd Home K.salem mun ah PWF te etkawlna nuai ah um chu a dai(fencing) a hoi lo ziak in gu-chate'n lemchang la in van tiang a gumang tau ah. Home a um te l la hiat sa gual un naupang ngawn leh enkawl tu la numei ngawn ahui ah. Tulai chu l hiat tak gual un zan lam vang vang leh Khamthei bawl te guk ding hawl ah vak a um sek ua. Zia thu te haw chu Home ah um te a pat report dawn ahi dungzui in Project Board ten emergency meeting nei ahi. Sum budget a um leh umlo thu hita lo in poimaw a ngai ahi ziak in fencing chu siam pha-

sak ahi. Project Board chun KSP nu leh pa te kiang ah fencing siam phalna a ki dawn in a mau in le ei phal piak phat un nasep chu pat ding in a um ta ahi.

2. Fencing siamna tawmngai sua te-

Fencing siam na ding ah tawmngai ei sua piak thei ding pen ti in Project Board Member lak ah mi na sepna zosia ah mawpawtu pen ding in Upa Thangneilal, Tangmual guat ahi. A man a seppi ding mistry leh semtu dingte hun pui in na chu sep tou zel ahi. Zia ban ah chun Tangmual KKP te le tawmngai hung sua ding ah chial ahi dungzui un a hung kuan ui. Tawmngai hung sua dangte ahi leh K.salem kochuam te, Project Board mem-

berte, PWF incharge Rev. ST. Kaia Vaiphei, Executive Secretary, KSP leh Home ah umte zosia ziak ah fencing siam nasepna chu zaw in a um thei hi.

3. Fencing siamna sum chungchhang-

Fencing siamna sum mu dan leh mat dan ahi leh Home a ding ah masang a pat sum ah a la pang zing Matt Slone & Jacintha Lalnunthari, U.S te inkuan (Pi. L.chawii suapipa chanu pawsal

te) Delhi a sem te panpina ziak ah fencing siamzaw thei ahi, a mau inkuan in Pathian nasepna ngai in Home a ding in sum a hun thawt sek uh ahi. A mau sum hun thawt ₹. 1,80,000(One Lakh Eighty Thousand) leh PWF sum ₹. 67,061(Sixty seven thousand and sixty one mangcha aki-gawm ah ₹. 2,47,061(Two Lakh forty Seven thousand and sixty one) seng ah siamzaw ahi.

4. Home a ding ah tawmngai hung sua te (2020)

S/no.	Min	Address	Thilpiak
1.	Upa Genhau & family	Compound veng	Tables & Chair ½ dozen
2.	Central P.C PWF	Compound Veng	₹. 1,000/-
3.	SBI Staff	Lamka	Portable Solar set
4.	Robert,Venkim,Thiemneihoi	Leilon	₹. 300/-+ Juice + Eatables
5.	Upa D.Mina	Lingsiphai	₹. 200/-
6.	Gangpimuol KKP	Gangpimuol	Rice 1 bag + Eatables
7.	Linda & Family	T.Munjang	Rice 1 bag + Sugar 5kg + eatables
8.	Thianu,Moinu,Tete	Saipum	Buhum 1 bag+ Rice 8kg
9.	Kangvai PWF	Kangvai	₹1,300/-+ Rice 52kg + Sugar 2kg + Salt 2kg
10.	S.Kotlian KKP	S.Kotlian	Umbrella 6piece + Water bottles 6piece
11.	Jacintha Lalnunthari	Delhi	Naupangte puanak di
12.	Pu. P.Kamkholal MDC	Lamka	Rice 1 Bag
13.	K.Salem P.C	K.Salem	Rice 27kg
14.	KSP Office	Tuibuang	Rice 1 Bag

15. Ruthy	K.Salem	Potato 3kg+ Ngari
16. Mapuii	Kawnpui	₹ 1,000/-
17. Ngailien	K.Salem	Vegetables(Khangkhu)
18. Paungailian	Lamka	Dal 8kg
19. Lingsiphai KKP	Lingsiphai	Aktui 3plates + Mustard Oil 1bottle
20. Saipum KKP	Saipum	₹. 1,000/-
21. Haumalsawm	Saipum	Rice 1bag
22. Rev. Seilunlal	Tangmual	Rice 1bag
23. Pu. Khaikap Vaiphei enclave Imphal		Rice 50kg+Potato 10Kg+Mustard Oil 1 litre
24. Tuithanak PWF	Tuithanak	Rice 1 bag+Mustard oil 2 litre+ Dal 3kg
25. Nu. Bawngnu	S.Kotlian	Rice 1bag
26. Tv.Thangzolian	Kangvai	Eatables
27. Rev. Thanglianmang	Kangvai	Bawngsa keu 1kg
28. Pu. Henzagen	Gangpimoul	Rice 1 bag+Dal + Mustard oil+Onion
29. Town District PWF	Town District	₹. 680/-
30. Leilon PWF	Leilon	Vegetables
31. Paknu	Leilon	Rice 1 bag
32. Kimvak	Leimakhong	Ceiling fan 1
33. Ngaikim	Leilon	Ceiling fan 1
34. Tinneihoi	Bisanmual	Chini 3kg
35. Tingboi & Neilam	Saipum	Aktui 1plate
36. Jenny	Saipum	₹.1,200/-
37. Kapmuan	Lingsiphai	₹.100/-
38. Upa Naulem &Family	Gangpimual	Cake + Aktui 1plate + Vegetables
39. YMA Manipur group	Manipur	₹.10,000/-
40. Tv. Jangthang	Imphal	₹.10,000/-
41. Upa Kailianlal & Family	Shillong	₹. 5,000/-
42. Tv. Kamlaldin	Nghathal	₹.1,000/-
43. Nu. Hoiting	Saipum	₹. 350/-
44. Nk. Kimjoy	Saipum	₹.4,000/-

Zia achung ah kitaklang te khel ahin panpina hun pia zikkh-
ial le um thei ahi zia in la ngaitiam nau ka hun dawn hi.

Home a dinga pan latu te zosia Pathian in taksa leh thagau
in hun malzawl chiat hen la, malam ale pan la zel ding in Pathian in I
mau pui zel ta hen.

INKUAN AH LALPA NASEP TEL JOSHUA

~Rev. N.Dalla Vaiphei

“Kei leh ka inkuan te’n vang Lalpa na bep sem ingkau.”

Joshua 24: 15

Joshua kamsuak a chungah i vak taklat uh thumal hi nidang a khan a kua kua’n le ila dawi chiat uh hiding a hia, In tin phial in i In bang un ila tak sau sau ua, Inkuan ah Lal nasep phatdan chu dawi umsa chiat kihi sam ding a hi. Maleh, tu lam ahin ziagual poster te kha mu ding a vang ma ma tai.

Tukum i vangphat nau khat chu, inkuan ah Lalpa na i sep theina diu, hun lemchang tak mai Lalpa’n ei siampiak ah, hiat khol le hilo, gam pumpi lockdown a hung um ah, mani inkuan chiat ah Insung ah ki kul khup in insung mite chau tawh hun bangchan a hem i hung um khawm ua, inkuan ah Lalpa na i sep ding dan uh ki vaihawm na lemchang takmai Pathian in ei la lemguat piak hiding a hi.

Nasep lak lak ah sep thaman umpen chu Lal nasep hi a hia, na lak lak ah na pawimaw pen chu Lal nasep ma hi a hia, zia ala ki-tel khak te chu mi vangpha chung chuang leh mi awchat um pen pen te ala hisek uh a hi.

Ngaitua tia, puitu Mosi thi nungah Israel puitu hina mun lua tu dingah guat ah um Joshua

khan, Israel te chu Jordan lui a galkai pi zaw in, gamtiam kanan gam ah melma tamtak azaw nung ua, gal muang ah a umlai tak un, Israel upa zosia kokhawm in, zia dotna pawimaw tak hi a dawng ta ahi.

“Lalpa nasep hi nuamlo la hui leh, kua na ahem lasep diu.., la pu la pateu in luipi gal lam ah a na asepep uh pathian te na kha a hem ? ahilo leh la luanau gam ah Amorte pathian na ahem ?..tel un..” ati a hi.

Zia dotna pawimaw tak mai hi tuni’n nang leh kei le ei ki dawng zing a hi. Dawitel na nei-thei ah siam i hi ziak un, Kua pen na a hem i sep diu ? tuni hi tel hun a hi.

Joshua in vang ama leh a inkuan ua Lalpa na bep sem ding a hidan uh hangsan tak in a

puangdok a, zia phat chun, mipi te'n le Lalpa na bep sem dingin thupukna a bawl tau a hi.

Ahinla, Lalpa na hi a nuam nuam in mawk sep ziang thei a hi pua, a ziak chuh Pathian chu thiangtho Pathian a hia, thikthusia Pathian hi kit nalai a hi. Lalpa nasem ding chun zia thil pani hi ngaitua masak ngei ngei ding ah pawimaw ahi dan, Joshua kamsuak a pat in vak en khawm tiam hi tiu:-... (24:23)

1. Gamdang pathian te pai un :-

Malai Israel te hun ah chun gamdang pathian iti phat tak leh, muthei ah milim pathian, khut ah siamkawm te haw genna gual a hi deu sek hi.

Zia gual milim pathian te chu paimang siksek masak ahilo chun Pathian hing na chu sep thei hi naisailo ahi. Tulai in zia gual siamkawm milim pathian te chu umtho nale le, eilak ah chu muding a um ta sam puai.

Himaleh, muthei lo ah gamdang pathian i lak ua umzing chapon, lululna, hiamngam na, thanhuaina, du amna etc.(gitlona tincheng timai le hin huap suak pen ina.) zia haw zosia kawl zing

pum a hin Lal nasep bawl ham ham leu hinle, mui chu tak tak thei lo ding a hi ziakin, ziate chu eimau a pat paimang siksek masa din Lalpa'n ei dawi a hi.

2. La lunggil uh Lalpa dia awnsak un:-

Lunggil mun awnglo hialpi ah le Lal nasep thei dan lampi le umthei tho a hia, mani phul na mai ah Lalpa nasem lawi le umthei ma ma a hi. Lalpa na i sep tak tak ding chun, a masa'n i lunggil mun thuk pen Ama a dia awnsak phawt ngai a hi.

Taksa lam nasepna a chun i nasep na pa kiangin i lunggil mun awnsak khello le hinle, a nasep chu a khawk na bangma a um pua, himaleh lei leh van Lalpa nasem ding chun i lunggil mun thuk pen A ma a dia i awnsak zet lo chun, a nasem in ki kawu leu hinle, a na neitu Lalpa'n ei pawmlo diaklo chun, a gim thawn mai mai kihi ding a hi.

Joshua'n Lalpa nasep atel na hi ngaitua thak tia, bang thil a mu,.. bang hiatchian anei ah,.. zia gual lawm lawm ah Lalpa nasep ngaikhawk tun tun mai a hi tam ?.. tih ngaitua kham a ting a hi. Zia hin thil pathum vak

taklang kit hi tiu :-

1). A pu Mosi ah Pathian lopina a muchian :-

Puitu Mosi Lalpa Pathian tawh naicha ki ho mat zing leh ki vawp zing ahi dan uh hechian leh muchian tu pen chuh Joshua hi a hi tihi gentam ngailo hial ah vak hiat daw ziang thei a hi.

Sinai tang vum ah Pathian in puitu Mosi a kodaw lai akhan, kua ma dang tawnpi loin, Joshua in a nung azui ah, thusawn piak suang pek ah ki ziak a hun lak lai ah khan le, tang nuai lam mun khat in Joshua in Mosi a ngak zing a hi.

A pu Mosi a din gin um tak in a nung a zui zing ah, Mosi ah Pathian lopina hung kilang leh Pathian thil bawl lamdang tak tak te kha Joshua in a muzing zia kin, zia Jehovah Pathian hat chungnung chu zamsan thei ding gual a hilo dan a hechian a, Mosi leh Pathian ki vawp dan a pat in Lal nasep pawimaw dan tamtak a zildawk a hi.

Lei leh van siamtu hat chungnung Pathian chuh hechian ta lua'n, A ma na bep sem dingin, thupuk na a siam ta a hi. Puitu masa te leh tu tu ah thagau lam ah ei puitu teu a pat Pathian lopi

na kilang sek khenkhat i mu uh um ngei ding a hia, zia a pat chun Lal nasep ngai khawk na nei thei leu hin, a pha chuam pen leh a lawk pen chu kiji mai ding a hi.

2). A ma hinna ngei ah Pathian lopina a muchian:-

Joshua hin puitu masa Mosi a pat Pathian lopina a muchian bep hi loin, a ma hinna ngei inle a muchian in a hiachian ma ma a hi.

Jordan lui a ka,n lai ua Pathian pui huaina lamdang, Jeriko kul lopi mihing hatna panglo ah, azaw dan teu leh, kanan mite bailam cha a zaw dan teu, Amorte tawh a kido lai ua, a zaw masiau nisa le Gibeon chung zawn ah ding den ta, thapi le Aijalon guam chung zawn ah ding den ta, tite haw kha, Pathian thil hitheina lamdang, a ma hinna ngei ah a muchian ma ma te kha hi ngei ding a hi.

Zia zozai Pathian phatna lopi tak dawng tu Joshua chun “ Kei leh ka insung mite'n Lalpa na bep sem ingkau.” a ti hi thil mak hilo hial a hi. A ziak chu Pathian phatna muchian tu te'n, Lalpa nasep sang ah sep thatnop um a sak zawk uh khawvel ah thildang bangma a nei ngailo uh a hi.

Joshua hunlai gualin tulai hinle, muthei in Pathian pui huaina la chungin a kilang hehu lo maithei hi. Maleh entia... nisin, phatsin, dakkal tin mai a hinle Pathian pui huaina maktak i dawng zing uh ahi hila...!. Pathian in maw..minute khat bep bep hile ei ngaisak loin, eila hemil tamai zen leh chu aw..!, i hatna hu teu hih bei ngal intin, kichai mai ding i hiu ei vei..

I bawsiat nau haw hile..i bawsiat gual tak ua eile thuk ding hita leh chuh..!, kua a hemtu chan chan dam nalai lai ding ??..!. maleh Lalpa'n a hepina in ei kaihuai ah, a nasep ding ei phal piak naklai zia ah i hinnau suk-sau ah um mai mai i hiu ei vei.. Zia chu Joshua'n a hiatchian bek zia kin Lalpa nasep ala tel a hi. Nangin kua nasep latel diam ?.

3). Lal nasep lawk zia a muchian :-

Joshua in thildang zosia sang in, Lalpa nasep a ngaik-hawk bep hi loin, a phat chuam dan leh a lawk zia a hechian ma ma a hi.

Bang bawl in, bang sem le hinle, i nasep him him hi a lawk zia i hiatchian lo chun, that nopna a umthei pua, bangma ngailona leh thatdana a um tei tei sek a hi. Lal nasepna diak diak a hin,

a lawk zia la hiatchian tak tak lo chun, thachawl um san latin, hak-sa sa ma ma ding la hi.

Joshua hin maw Lalpa nasep hi sep thaman a um dan a hechian talua, ama ngawn ah sep chule hawmthaw kisa talua in, a inkuan ua Lalpa nasep ding in thupuk na a siam uh a hi.

Insung khat ah pa pen in Lal nasep, a dangcheng in na-dang buaipi, Lal nasep na pan lak gualo, inkuan bang a um ua, a hilo leh nu pen bep in sem sem, pawsal te kithada, chate la a ut ut ua um ziang, ti bang le umthei a hi. Zia khel a chun, chate bep Lal nasep ah pang, nu leh pa te'n ki hiatlo sak, inkuan ti haw bang le a um ua, zia gual inkuan te chun Lalpa nasep lawk zia hiatchian chu thil haksa ma ma nalai ding a hi.

Joshua leh a inkuan te'n vang Lalpa nasep phatchuam dan leh lawk dan a hechian ua, thildang zosia sangah thupi pen in a ngai uh a hi. Joshua gualin ei unle Lal nasep i ngaihawk nau em?. I chung ua Lalpa phatna sim senlo te hi ngaitua tia,!. A ma na bep sem leu hinle, A ma'n ei hepi na zozai te hi, khat ziang cha hile, lethuk zo naisailo ding

i hiu a hi.

Sam ziaktu chun, “Ka chung ah a thilbawl phat zosia ziakin, Lalpa kiang ah bang a hem ka piak thuk ding ?.” ti in Lalpa nasep thei ding dan a hawl luai luai mai a hi. (Sam.116:12). Pa Pathian in ei hepi ma ma ziakin, a chapa changkhat neisun, Lal Jesu ei pia, tulai tena da,n hileh za ah za ei piak tina a hi.

Lal nasep na bak pawimaw ma ma ziang, thilpiak ah pan lak-na hih, mitam zawn i septhei nau chu a hi. A hinla, tamtak in Lalpa chanvo sawmakhat ziang le pia sumsial ngui ngui ziang bang a la um nalai uh a hi. Inkuan tinte hin eimau lemchan dan chiat ah Lal nasep i hun ngaikhawk chiat phat tak ua leh, Pathian chu a ko-chuam te lakin hung ki chawisang ding a hi.

Mi lawi khen khat te'n Lalpa nasep theina hun lemchang a mu lai a le, ki hiatlo sak ah, piak thei na malzawl na a dawn lai a le, Lalpa dia pia phallo, sumsial tun tun mai.. leh, suanlam siam siam ziang tite bang mi ala um sek uh a hi.

Joshua leh a inkuan te'n vang, Lal nasep ala kitel ziak un, inkuan vangpha leh etton um-

tak, aphalam ah khang ki hilna a hung hitau a hi. Tunin ei mau inkuan chiat le vak ki enthak kit tiam hitiu le..Inkuan kim ah Lal nasep lunglut ihi chiat nau em ?..

Joshua leh a inkuan te'n ala ki tel uh Lal nasep hi, ei unle ila ki tel khak ua chun mi vangpha pen hi ding i hiu. Inkuan ah Lalpa nasep ngaikhawk ah, damlai ni hun saulo cha i nei sung ua hin, ki siak takah pan la to zel di'n, simtu te zosia Lalpa'n mal ei zawl chiat ta hen

--o0o--

LALPA JAN-AN TAWH KISAI NGAIDAN LEH GEN DAN CHUAM CHUAM TE

- Rev. Dr. Hangpi Manlun,
Executive Secretary, Zou Synod

1). Thumapui:

Lalpa jan-an (Holy Communion) chu kochuamte thilbawl/matchak pawimaw khat ahi. Malai a pat tuni tiang in kochuam hindan tung dingtu leh kochuamte Pathian hona pawimaw tak ahi. “Lalpa jan-an” chu Lalpa thina hiatzingna ding ah vaithum leh grep tui (uain) nek khawm leh dawn khawmna ahi.

2). A hung umna ziak leh a phudawktu:

Lalpa Jesu a thi ding kuan in a nungzuite tawh chiakan kut ankuang a um ua, an a nek lai un Lalpa Jan-an (Sacrament) a hung bawl dawktu ahi. Zia Sacrament chungchang ah thupiakte chu chanchinpha bute leh Korinth lekhathawt ah ten I mu ahi (Mat. 26:26-29, Mk. 14:22-25, Lk. 22:17-20, I kor. 11:23-36). Zia Bible change a pat in Lalpa Jan-an chu Lalpa Jesu siamdaw ahi ngei hi ti a kilang hi. “Lei hiat zingna ding un zia hi bawl sek un” a ti gual ngei in kochuam masate kipat in tuni tiang

in I bawl zawm zing uh ahi. Chun Lalpa Jan-an hung piandawna ziak pani a um hi:

2.i). Khrista tawh ankuang umkhawm ah kipawlkhawmna ahi. Jesu khawvel ah a lenlai in a nungzuite tawh zia ankuang hi a umpi a, tuni tiang in zia ankuang ahin ei pawl zing sek a, a thawkit nung in le vaithum tawh uain in a pawl kit hi. **2.ii)** Jerusalem pindan chungnung ah Jesu thugen leh thilbawl chu (I Kor. 11:23-26; Mk. 14: 22-25; Mat. 26:26-29; I kor. 22:1-20) ah ten mu ahi. Vaithum leh uain a la, a thawkit ding etsakna in a mang hi. Zia hun ah a ankuang um uh chu chiakan kut ti'n Marka in ei gen ahi. Hun dang ah chiakan kut an a nek zing sek uh chu zia hun hin umzia nei tak in a umpi hi.

3). Kochuam pawl chuam chuamte ngaidan leh pawm dan:

Awle, thildang gual tho in Lalpa jan-an chungchang in le ngaidan chuam chuam a um a, ziate chu vak sui hi tiu.

3.i). Roman Catholic kochuamte

Ngaidan:

Lalpa jan-an (vaithum leh uain) chu Lalpa kiang ah lat ahi a, thiampu in phui a sap zaw tak leh vaithum leh uain hi ta lo in Lalpa taksa leh thisan tak tak a hung hi sek tai a tiu ahi. Zia chu transubstantiation ti ahi.

3.ii). Lutheran kochuam Ngaidan:

Pastor/ thiampu in phui a sap zaw nung in le Vaithum leh uain (grep tui) ma ahi jing tho a, maleh Lalpa taksa leh thisan chu vaithum leh uain lak a chun a hung pang a, a hung kizawp ta ahi. Zia chu consubstantiation kiti ahi. Zia chun Khrista taksa leh thisan ah thilhitheina a hung nei ta ahi. Etsakna ding in thik mei ah I em (hal) leh a hung sat tak leh a hung san pim pem a, himaleh thik ahina a bei diak puai. Ziagual-machun, Khrista thisan in a hung kizawppi /kipawlpi ziak in thahat in thil a bawl thei hi a tiu ahi.

3.iii). Calvin Ngaidan:

Vaithum leh uain (grep tui) in Khrista chu thagau in a hung pang sek hi. Thagaulam malzawlina leh kipawlina thiangtho in a hung zawm sek hi. Khrista taksa leh thisan etsakna ahia, a etsakna mai mai chu ahi pua, Lalpa chu thagau in a hung pang hi. Zia

hi ei Presbyterian te ngaidan le ahi.

3.iv). Zwingli Ngaidan:

Khrista thawkna leh tatna I hiatzingna ding ua I bawl uh ahi. Zia hiatzingna chu I thagau ding un ann ahi. Vaithum leh uain chu zia teptena a mu thei ah I nek leh I dawn uh ahi ti ahi.

4). Lalpa jan-an tawh kisai gendan chuam chuam te:

4.i). Lalpa Jan -an (I Kor. 11:20).

Lalpa jan-an ti ahi tak leh hiatzingna lam a gen ual deu hi. Khrista'n eimau ding ah a sep sa leh a hung sep naklai ding te ei hiatsak hi.

4.ii). Kipawlina thiangtho (Holy Communion):

Chuleh kipawlina thiangtho ti chu (I Kor.10:16)-ah i mu ahi. kochuamten a hing zing a Lalpau tawh a kipawlinau thiangtho in a mang ua, zia hun a chun gingu zosia zia kipawlina chun a pang uh ahi.

4.iii). Kipak thugenna (Eucharist) ahi.

Zia hi thuthung thak hun in a kilang tam bek puai. Himaleh kum zabi nina ah Ignatian in a hung mang masapen a, masang in kochuam masaten a la mang uh ahi. Khrista nasep ziak te,

hawkitna leh malzawlana ziate, Lalpa umpina ziate, Pathian in nek leh dawn ding ei piakna ziate ah kipak thugenna lam a kaww hi.

4.iv). Kithawina/kilatna (Sacrifice):

Zia chu khawvel gitlona ding ah Khrista nasepna gingu in a puanzakna leh Khrista a ding ah gingu kilatna/kipumpiakna lam a etsak hi. Chuleh, Lalpa jan-an genchetna ding in paukam kiting um thei tak tak lo ding ahi. Ngaidan khat ah gingtute kiang ah thagau thilpiak channa ding ah matchak khat ahia, a langkhat lam in, gingu in Pathian hepina/lungsiatna a channa matchak le ahi thei hi. Chuleh, zia Lalpa jan-an I nek tak ua leh lopi tak ah Khrista hung kitna ding chu I etsak sek uh ahi (Mak. 14:25; I Kor.11:26), ti le I hiatmil lo ding uh ahi.

5). Lalpa jan-an matchakten a etsak uh:

5.i). Vaithum:

Vaithum hin thagau lam an nek ding mawng ahi ti a etsak hi. Kuale zia vaithum nete chu a hing zing ding a hui. “Kei van ah kipat hung kipan vaithum ka hi” a ti ahi.

5.ii). Uain (grep tui):

Grep tui dawn ding diket chu ahi. “A dawn taphawt in kumtuang hinna nei ding ahiu”. Leichung damna ding ah Kalvari ah Jesu taksa ah kipat a thisan leh hinna tui hing luang chu a etsak ahi.

6). A hawm ding hun leh dante:

Kochuamte sik leh zal ah Lalpa Jan-an hawm ding in pastorte guat a hui a, amau kithuapi ding in kochuam upate guat ahiu. Lalpa jesun mipi sanga (5000) a vaak lai ah a nungzuite kiang ah mipi kiang ah hawm ding ah a piak gual in ei un le mipite kiang ah a chutna mun uh I zawt ua I pe sek uh ahi. Kochuam khenkhatte ahileh chu malam ah va kuandawkte kiang ah bep a piak sek uh ahi.

Chuleh, Lalpa jan-an hawp hun thu ah thuthung thak in kipuihuaina kichian tak a siampuai. Nasep. 2:7 in a gen dan in Pathian ni sin leh a hawp sek uh hi in a gen hi. chuleh nasep. 2:46 ah ahileh nisin hawm sek hi un a ngai thei kit hi. Kum zabi 2na lam ah khan “Didakhe” bu in a gen dan in ‘Lalpa ni’ sin leh hawm sek hi un a gen kit hi. A hunbi nei chu a haksas, I dabu in kum khat sung

ah a tawm pen ah thumvei bek hawm ding in a gen hi. Himaleh zia zat bep chu hawm ding a hem, bial fan sin leh hawm ding tina ahi diak puai.

7). Lalpa Jan-an hawm dan chuam chuam te:

7.i). Nasemtu, Pastor in nungzuite (Upate)- chu maicham lam ah a ko a, a din kual sak a, a kiang ua vaithum leh uain a piak a, zia zaw tak chu leh mipite kiang ah a hawm sak hi. Zia chun a etsak ahileh – Khrista chu ei uh kithawina ding ah ama leh ama a hung kipia, ama ngei chu midangte ding in a hung kipiai ti a etsak hi. **7.2).** Nasemtu, Pastor chu maicham bul ah a ding in mite chu ko in a la pia sek hi. Zia chun a etsak ahileh – Jesu neina ding in a kianglam l zawt uh a ngai hi ti a etsak hi (Johan 6:37). Jesu Khrista'n, "Kuale ka kiang ah hung chu a la deldawk lo ding ka hi" a ti ahi (Johan 6:7).

8). Lalpa Janan l nekna zia uh:

8. i). Lalpa thina zia ah hukdam l hi uh l hiatingna ding un (Luk. 22:19). **8.ii).** Jesu Khrista kithawina Pathian hung piak ahi (l Johan. 1:3). **8.iii).** Jesu Khrista kithawina Pathian hung piak ahi Jesu Khrista l taksan ua l pawm

zia uh (Late 116:12). **8. iv).** A thina chu l hukdamna ding uh ahizia in (Heb. 10:10; Eph. 2:4)- ti te ahi.

9). Lalpa Jan-an ne dingte hiat ding:

9. i). A gitlonateu a sim ding uh ahi (l Kor. 11:28; Joel 2:12). **9.ii).** Hin thak ah a hin ding uh ahi (Rom 6:5). **9. iii).** Khrista amau ding ah a kipakna chu a pawimaw takzet ui ti a kihiat ding uh (Mak. 10:45; Johan 10:11). **9.iv).** Kipak tak ah Khrista thina a hiat zing ding uh ahi (Rom 5:8; Kih. 1:5). **9 .v).** Mi zosia a hepi ding uh ahi (Matt. 5:44; l Pet. 1:22) – tite leh a dang dang te zia ahi.

10). Lalpa Jan-an Phatchuamnate:

Lalpa Jan-an (sacrament) phatchuamnate leh lawknate chu a matchak zia a hem, ahiloleh a semtu in a kinga puai. Ginna ah umtu/netu ah thagau thiangtho in malzawlina a chansak zia in a phachuam ahi. l taksa in vaithum leh uain a hatpi leh phatpi gual in l thagau lam hinkhuau sukhatna ding leh sukhawina ding in Lalpa Jan-an chu a phachuam hi. Gingtu hinkhua sudettu, kipumkhat saktu leh Khrista lam ah kainaitu le ahi.

Ngaidamna

~by Miss Chinnu, KSP Receipt Clerk.

1. Ngaidamna hi khawvel siamphatna mechine ahi.
2. Ngaidamna panglo in Pathian mel muthei ahi puai.
3. Ngaidamna hi vangam chabi ahi.
4. Ngaidamna hi malzawlina nak ahi.
5. Ngaidamna'n mihingte hi za-um dingin a siam thei hi.
6. Ngaidamna kipakman chu vangou khawlkhawmna hi ahi.
7. Lalpa'n ahun ngaidam la hi tak ziakin, nang inle midangte ngaidam thei dingin kizil in.
8. La mel(face) facial na dinga damdawi phapen ngaidamna hi mang sek in.
9. Ngaidamna hi kicheina gimtui ahi.
10. Ngaidamna lanei ziakin khrista'n ama gimtuina'n ahun chei ahi.
11. Ngaidamna hi a manbei ah muthei/neithei ahi.
12. Ngaidamna hi Pathian mel muna ahi'n, vangam kalbi(step) le ahi.
13. Ngaidamna panglo in Inchen siam thei ahi puai.
14. Ngaidamna hi melma zawna ahi.
15. Ngaidamna nei mi chu mipil ahi.
16. Ngaidamna'n gualpha a siam hi.
17. Ngaidamna lampi ah chun kipakna a chia sek hi.
18. Umzia nei tak ah na la sep nawp leh ngaidamna hi mang sek in.
19. Ngaidamna ngakuai ah Awk khate chu mi vangphate ahi sek un, a kisik ngai puau.
20. Ngaidamna'n khawvel a dawmkang zo hi.
21. Ngaidamna ti hi khawvel ah paukam melphapen ahi.
22. Khawvel ah gam phapen leh nuampen chu ngaidamna leh kihiat-thiamtuana gam hi ahi.
23. Ngaidamna hi gimtuina thaichi ahi.
24. Khawvel ah thil mantampen leh mantawmpen chu ngaidamna hi ahi.
25. Ngaidamna ziakin nang leh nang la ki su mantam thei hi.

Presbytery leh Synod sung thu chuam chuam

- 1. Beigual:** Tu kum chu covid- 19 ziak ah lockdown March thatawp lam a pat biakin hung kikhak to in, kochuam tamtak dawgual in kikhawm thei lo um leu hen le Pathian mapuina jal in September beigual tha hung tung to in session thupukna dungzui in Rev. Seilunlal in Beigual thupi: “Thianthona” ti chungchang lekhabu ah a hun guanggal chu kochuam tin ah hawmdaw ahia, bu khat ah ₹. 50 ah kochuamte kiang ah piak ahi. Lockdown ziak ah Biakin kikhawp official ah phal hinailo maleh KSP sung ah kochuam tamzawten beigual phatak in I mang thei ua, biakin ah kikhawm theiloten le Tual upa bial ah kikhen in innchawtna bek in I mang ua, kipak a um ma ma hi. Beigual I phatchuampi chiat ding uh ka kinem hi.
- 2. Town District Pastor Quarters:** Town District Pastor Quarters sak pat ahi ta, a foundation tiang zaw ahi tai. A mun kidailo ziak in Quarters hi a sawng ah sak ding ah blue print siam ahi. Zia quarters sakna hi Nghathal kochuam mawpuakna ahia, kum 2019 budget ₹. 2, 00,000/- (two lakhs kha mat zaw ahi phat in budget thak ah ₹. 2, 00,000/-(two lakhs) ma tu tiang hin sanction ahi. Kum 2/3 sung ah zaw ziang kitup ahia, guanggalna dungzui ah phatakcha zaw fel ahi theina ding in kochuamten pauchapna del zui chiat ding in ka hun chial hi.
- 3. Mission Field:**
 - i) Cachar Field ah I gam lui guam tui lian in a hung kek sek ziak in a dalna ding siam ahi. Gawpum tamthim tak chawk ahia, luigei ah khet ahia, a nanna ding siam ahi.
 - ii) Tispari Mission Field April tha a khan sak zaw hita maleh lockdown ziak in tutiang hin hawndaw thei nai lo in a um ziang a, chun lockdown ziak in school le a kai thei diak lo ahi. Lockdown hung kihawn phat tak leh Sekmai biakin tawh hawn khawm ding ah guanggal ahi.
 - iii) Saipum kochuam hi tumalam a khan missionary box leh EPT ah

hatlo tak himaleh chanchinpha gen nasepna lam hun ngaikhawk thak in missionary khat chawm nuam in dawtna a hun siam ua, kipakpi a um ma ma hi.

4. Biakin Sakna:

- i) Tangmual kochuam in Biakin rawng a nu zo tau a, a etlawm ta ma ma, kipakpi a um khawp mai hi.
- ii) Head Quarters Church, Tuibuang kochuam in biakin tukvan siam zo in rawng a nu zo tau a, a etlawm ma ma tai.
- iii) Gangpimual kochuam in biakin sakna sunzawm in tuhin a chek (brick) a kam suak tau a, kawt leh tukvan haw siam ahinai pua, aluminum tawl theite mat ding ah a guanggal uh ahia, maban ah hin a bang plaster bawl ding ti ahia.
- iv) Kangvai kochuam in biakin sakna sutzawmna ding in sum hawlna bawng that in a zuak sek ua, a hapan ma mau. Tuhin a gu ti chu lintel leh beam sia a zo tau ahia.
- v) Tonglon D kochuam in Biakin chung langva khu thak in a bang le cherry langva bang chi bawl in a floor plaster bawl in fan a kawi ua, a nuam ma ma tai. Tuhin a mailam siam ding neukhat bep a vat ta, a et hawi ma ma tai.

5. Sunna: Date 16th September 2020 ni khan Kharam vaiphei ah um Tual Upa Jangkhuap chun a insung mi leh kochuam ngaicheng nusia in van khawpi ei la kilawi san tai. Ama hi Sadar District standing committee member ahi bak in mi tawmngai Pathian nasepna mi kipe zo tak ahia. Chun KSP. M & E Committee member pawimaw tak le ahia, aman ei nusia hi KSP in a kisun ma ma a, a insung mite a kisunpi thu zia “Damna Aw” a hin KSP thasik in ka hun puang ahia.

6. Khawmpi: Pathian mapuina zal in October tha tung to ding I hi ta, October tha hi District tin ah khawmpi chuam chuam um hun a hung hi ta, Pathian jal ah lockdown a hung kihawn ah khawmpi I mat thei ding uh kinem in district ten programme I siam tau a, khawmpite I mat thei ngeina ding un pauchapnan del zui chiat hi tiu.

7. Jubilee: Tu October thasang hin KSP sung ah Jubilee lawpna ding pathum l nei ua, ziate chu lawting tak ah mat zaw ahi theina ding in l pauchapnau in del zui chiat hi tiu. Jubilee lawpna ding mun leh hun a nuai ah hin ka hun taklang hi. Ziate chu:

- i) Sadar District Diamond Jubilee – Kharam Vaiphei P.C. – 16 – 18, October 2020
- ii) Sadar District KKP Golden Jubilee – Leilon P.C. – 2 – 4, October 2020.
- ii) Khuga District Golden Jubilee – Kangvai P.C. – 23-25, October 2020.

8. Sum dinmun: Lockdown ziak ah biakin kikhawp thei lo ziak in kochuam pawlpi tamtak sum dinmun ah keniam maleh Pathian mapuina jal leh KSP pastorte, upate, tual upate leh mi nautangte Pathian lalgam nasepna thilpiak lam ah l pankhawmna jal un ginchak sang in l sum dinmun uh a phama ma, nangmau ziak in Lalpa lopina chang ta hen.

- Exe. Secretary, KSP.

--o0o--

'DAMNA AW' PHUNGVUKTUTE :

PATRON MEMBERS :

1. Pu P. Vaiphei IAS, Imphal
2. Upa Henthianthang, S.Kotlian
3. T.Upa Haulallawm S.Kotlian
4. Upa Thienkhomang S. Kotlian
5. Upa Laltinkhup, HQ. Church, Tuibuang
6. Pi Manliankim, HQ. Church, Tuibuang
7. Upa D. Mina, Lingsiphai
8. T.Upa Ph. Gena, Lingsiphai
9. Pu. Khamlal Saipum
10. Pu Khamliankap Saipum
11. Pu. Tinlunlal Saipum
12. Pu. S.Kapbawi New Delhi
13. Upa Genhau Central Church, Compound veng
14. Pu. Khailianbawi Central Church, Compound veng
15. Pi Kimtawi Kohima
16. Tv. Daniel Tangmual

MEMORIAL GIFT :

1. Pi Deem Melody, **Central Church, (Rengkai)**
[In loving memory of (L) Upa Lamthianlal]
2. Pi Rebekah **Kangvai**
[In loving memory of (L) Pastor Khaivung]
3. Upa Liansomthang **Lingsiphai**
[In loving memory of (L) Pu. Henzagen]
4. Pi. Nem Grace Boisi Capvung **Delhi**
[In loving memory of (L) Pi Vanlalchhuangi]

SUPPORTING MEMBERS :

1. Upa Khomlunlal S.Kotlian,
2. Pu. S.Thangminlian Lingsiphai,
3. Pu Lelboi, Lingsiphai
4. T.Upa Lalneilian Central Church,
5. Pu EL Soson Central Church
6. T.Upa Genminthang, Central Church,
7. Pi. Kimneihawi Saipum
8. T.Upa J. Mark Saipum
9. Pu Genthiankap, Nghathal
10. Pu Lianzakhup Nghathal.
11. Pu Lemthang L. Mission Veng
12. Rev. S.T.Kaia Vaiphei Nghathal
13. Nk. Dimkhoniang Zikpi Tampak

ENCOURAGING MEMBERS :

- | | |
|-------------------|-----------------|
| 1. Pu K. Minlian | Tangmual, |
| 2. Upa Ph. Kamlam | L. Champhai, |
| 3. Upa S.T.Siam, | L. Mission Veng |
| 4. Pi Chhungi | Hq. Tuibuang |

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

(i). Patron member- Kum 3 (three) a ding in. ₹. 3,000/-

(ii). Memorial Gift- Kum 2(two) a ding in. ₹. 2,500/-

(iii). Supporting member- Kum2(two) a ding in ₹. 2,000/-

(iv). Encourager- Kum 1(one) a ding in. ₹. 1,000/-

Chun, sum thawt nuamte a ding in:

A/C name: Khuga Sadar Presbytery(MPCS)

A/C nos: 32483318505

Branch code: 6182, CCpur

CIF nos: 86412486695

IFSC nos: SBIN0006182.

HIATSAKNA

Damna Aw ngainatna ziaka Encouraging Member ah pangtute zosia chung in kipak thu ka hun gen hi. Editorial Board dawidan dungjui in Encouraging Member hina hih kumkhat bep dinga bithiak ahi tak ziakin tuchung Issue ah kipat hin hung kisulang thei talo ahi. Memberte hi-atthiamna le i kidawn ngal ui.

~Editor.